

## Nuutsbreef , mei/juni 2023

Bèste Veldeke minse,

### 1. Wie stuitj 't mit 't dialek in de sjoale?

Väör de thema-aovendj äöver dialek in 't óngerwies op woonsdigaovendj 10 mei a.s. haet 't bestuur van VKE minse oetgenuuedigdj, die hie actuele informatie äöver kènne beje.

De erkènning van 't Limburgs es laevendje taal hultj namelik ouch de verplichting in nao de toekoms te kieke. Óm te beginne de vraog: is det waal nuuedig dao werk van te make in 't óngerwies?

Riek en provincie höbbe den waal aangegaeve zich daoväör te wille inspanne, mer daomit is 't nog neet gebäördj! 't Geuf waal aan de provinciale taalorganisaties wie Veldeke, de mäögelikheid óm stappe te zette. Dao äöver wille w'r uch op deze aovendj informere.

De praktijk van vandaag en nuuj initiatieve kómme aan bod. Daoväör zeen versjillendje spraekers oet 't óngerwies – van peuterspeelzale tót en mit de PABO - bereid gevónje get te kómme vertèlle en/of te laote zeen. Teves kènne vervolgstappe bespraoke waere óm 't dialek in 't óngerwies in oos regio 'ne impuls te gaeve. Daoróm zeen naeve de Veldeke-leje ouch óngerwiesprofessionals en - bestuurders, beleidsmitwirkers, lokale politici en anger geïnteresseerdje oet de gemèndjes Ech-Zöster en Maasgouw van herte welkom. **De thema-aovendj is vanaaf 20.00 oer in de Peijerhaof.**

### 2. Gedichte en leedjes oet Zitterd.

De "Literaire aovendj" van dit jaor weurtj ingevöldj door Zitterse sjrievvers en 'ne zenger. De aafwisseling van poëzie, proza en meziek belaofdj weer 'ne sjoane aovendj te waere. Phil Schaeken en John Hertogh zörge väör de literaire invölling mit gedichte en verhaole äöver allerlei versjillendje óngerwerpe. Meis gehaoldj oet dagelikse dinger. Soms mit 'ne serieuze, mer soms ouch 'ne humoristische inslaag. René Haustermans - väör diegene die al langer lid zeen geine ónbekèndje - zal dit ómlieste mit meziek en leedjes, die ouch hunne basis in Zitterd höbbe: dènk aan Frits Rademacher, aan Jo Ehrens en aan Toon Hermans.

**Woonsdig 14 juni van 20.00 tót 22.00 oer in de Peijerhaof.**

### 3. Aanmelje väör oos oetstepke.

De bösreis zal dit jaor zeen op vriedig 7 juli. Op 't programma väör dae daag stuitj 'n oetstepke nao noord Limburg en de grens nao Braobantj. W'r bezeuke 's mörges 'n nuuj tentoanstèlling in 't Limburgs Museum in Venlo. 's Middigs gaon w'r nao 't Toon Kortoomspark bie Deurne. Opgave väör dit oetstepke këntj vanaaf noe door 60 euro p.p. äöver te make op de raekening van VKE bie oze penningmeister, weer mit vermelding van eur lidnummer. Raekeningnummer en lidnummer staon

oppe achterkant van eur Veldeke Bekèt. Jao, 't is weer 'n paar euro duurder es väörig jaor, mer g'r begiptj waal wodoor. Dao is waal alles inbegrepe: bösreis, tas kóffie, entrees, lunch. Aanmelje kan tót 1 juli of tót de bös vol is. Introducees kènne mit es nog plaats is; zie betale 65 euro.

Lètj op: trök betale bie neet mit kènne gaon is neet vanzelfspraekendj! De koste zeen den al gemaaktj en de bös blif aeve duur, ouch mit 'ne persoan mieë of minder. Baeter is óm bie ónverwachdj verhinjering óm mit te gaon, emes anges in eur plaats te vraoge.

***De bös vertrèktj óm 09.00 oer vanaaf de Nuuj Mert. Tösse half zeven en 7 oer zeen w'r weer trök in Ech.***

*Vruntjelike groete names 't bestuur,*

*Ton van Wegberg*